

TIT - TĪT - Tolysh Bible
TĪT Azeri-N: Azerbaijani Bible 2008
65001 - Unicode (UTF-8)
CAP Information: checked/corrected 2009 HAB

TĪT

Pauli bə Titi Nomə

Tit

PAULĪ BƏ TĪTĪ NOMƏ

VƏSƏ

Tit de Pauli vəzi vositə İsa Məsihi ğəbul kardə qıləy yunanə cıvonə zoəbe (1:4). Əy Şoyə Xəbə pevılo kardeədə bə Pauli koməqəti kardəşbe. Pauli Krit ləpəkədə biə imoniyon icmoədə nəzorətəvoni ğəzinə xıdmət kardeyro ıştə cıvonə koməqəvoni təyin kardəşbe. Bəy koməq karde məğsədi ın nomə nıvıştə biə. Bı nomədə bə kali əsosə məsəlön diğğət doə beydə.

Paul Kritvıjon xosiyəti zıneydəbe, əve bə Titi yod vardeydə ki, imoniyon icmo rəhbər çoknə bənıne. Çəyo əv icmoədə imoniyon mıxtəlifə daston – sininə merdon iyən jenon, cıvonon iyən ğulon omute barədə məsləhaton doydə.

Nomə oxoədə Paul imoniyon arədə bə rəftori aid nəsyəton doydə bə Titi, xısusən, xoşrəftor iyən dustə mınosibətədə bey, nıfrətiku, mıbohisəku iyən icmoədə biə co-co fikronku diyəro mandey asbardeydə.

Kitobi məzmun:

- 1:1-2 Səlonon
- 1:3-16 Titi Kritədə biə vəzifə
- 2:1–3:9 Rostə təlim iyən rəftor
- 3:10-15 Xahişon iyən vido kardey

1

¹ In nomə Xıdo ğul iyən İsa Məsihi həvari biə, az Paulikuye. Xıdo səçin kardə insonon imon vardeyro, bə mominəti mıvofiğ həğigəti sərəseyro az təyin kardə bim.

² In həğigət bə zolə jimoni umu doydə. Hiç vaxti du nıvotə Xıdo zəmon binonibə bənav vəd kardəşe ın umu. ³ Çəmə Xıloskor biə Xıdo vaxt rəseədə bəştə əmri mıvofiğ de vədi vositə bəmi əmonət kardə İştə kəlomi oşko kardışe. ⁴ *Pıə Xıdoku iyən çəmə Xıloskor biə Məsih İsaku lutf iyən sulh bıbu bə eyni imoni qorə bəmi əsl zoə biə bə Titi!

*1:4 2Kor.8:23; Qal.2:3; 2Tim.4:10

Titi Kritədə biə vəzifə

⁵ Əve tını ləpək Kritədə oqətımə ki, nimədə mandə koon bə sə bijəni iyən çımı asbarde gəzinə har şəhrədə icmo rəhbəron təyin bıkəy. ⁶ *Rəhbər təyin kardə biə şəxs benoxsanə jimon kardəninə. İqlə jeniş bənəninə, çəy fərzəndon imonin bənəninin, beəxloğətədə ittithom kardəbiə nibun iyən beitoətkorə inson nibun. ⁷ İcmo rəhbər çe Xıdo koy idorəkə beyro benoxsan bənəninə. İştəku rozi, gəzəbin, şərovi həris, davekor, boştə xəyri nəvəkəs bənənin ni, ⁸ bərəks, gəonəğpərvər, xəymand, ağıl-kəmolin, ədolətin, momin, bəştə nəfsi hakim bənəninə. ⁹ Əv iştən bə rostə təlimi bəfomand bənəninə ki, bə co kəson de rostə təlimi nəsyət doy bızını iyən bəy vəynə beşəkəson mızəmmət karde gədir bıbu.

¹⁰ Oxo, xısusən, sınıtəti tərəfdoron dılədə beitoətkorə, puçə qəpəjən iyən hiləqorə odəmon veyin. ¹¹ Çəvon vəy se lozime. Çumçiko əvon nohəxə gəzənc bə dast vardeyro lozimmibə çiyon omuteydən, vey xıyzonon həmməyəvo məhv kardeydən. ¹² Çəvon qıləyni – Kritvıjon peyğəmbər hisob kardəkəsi jıqo votəşbe: «Kritvıjon hejo duyəvoj, bılxinə vəhşi, ləvəynə tənbelonin». ¹³ Im şəhodət roste. Əve əvoni ciddi mızəmmət bıkə ki, çəvon imon səhey bıbu, ¹⁴ bə Yəhudi əfsonon iyən həğiğətiku qardə insonon noə gəydon quş nıdən. ¹⁵ Bo pokə odəmon har çiy poke, bo nopokə beimonon isə hiç çiy pok ni. Əmma çəvon həm şınemon, həmən vicdon nopoke. ¹⁶ Əvon iddo kardeydən ki, Xıdo zıneydən, əmma deştə əməlon imi bə həşə jəydən. Əvon oləyz iyən beitoətkorin, bo hiç qıləy çokə koy bəvəc nıbomen.

2

Rostə təlimi əhəmiyyət

¹ Tı isə bə rostə təlimi mıvofiğ biəy omut. ² Sininə merdon omut ki səzukin, ləyoğətin, ağıl-kəmolin, imonədə, mehıbbətədə iyən durumədə nımunə bıbun. ³ Həmçinin sininə jenonən eynən jəqo de ədəb-ərkanı rəftor bıkən. Bıhtonəvot, bə şərovi mıbtələo nibun iyən foydəyn biəyon omutın. ⁴ Bə cıvonə jenon tərbiyə bıdən ki, iştə şuyon iyən əğılon bıpiyişone, ⁵ ağıl-kəmolin, ismətin, kədor, xəymand, bəştə şuyon tabe bıbun. Bəvədə bə Xıdo kəlo mi kufır kardə əbını. ⁶ Bə cıvonə zoonən ağıl-kəmolin beyro nəsyət bıdən. ⁷ Çokə koon bıkə har çiyədə nımunə bibi bə co kəson. Təlim omuteyədə səmimi iyən ciddi bibi, ⁸ tənğıd kardenibə səheyə sıxanon bıvot ki, bəştı vəynə beşəkəson çəmə həxədə bevəcə sıxanon vote nızın, xəcolət bıkəşın.

⁹ Gəlon sərosın ki, har çiyədə bəştə əğon tabe bıbun, əvoni rozi bahaştın. Bıdə cəvob onıqordının, ¹⁰ dızdi nıkən, əmma qırd etıboyn bıbun. De jıqoy çəmə Xıloskor biə Xıdo təlimi har cəhətə cazibəyn bıkən.

¹¹ Oxo Xıdo bə həmə insonon xılos vardə lutf zahir be. ¹² In lutf bəmə beimonəti iyən dınyovıjə ehtirosi rədd kardey, bı dovrədə ağıl-kəmolin, saleh iyən bə mominəti mıvofiğ qıləy jimon jıyey omuteydə. ¹³ Demiyən jıqo baxtəvərəti vardə çəmə umu

zahir bey, yəni əzəmətinə Xıdo iyən çəmə Xiloskor bıə İsa Məsihi izzəti zuhuri çəş bıkəmon. ¹⁴ Əy boəmə fido kardışe İştəni ki, əməni çe har curə beğanunətiku bıhırı, pok bıkə Bəştə məxsus iyən çokə koon kardeyro qıləy xəlğ bıkə. ¹⁵ İmoni de həmə səlohiyəti bıvot, nəsyət bıdə iyən mızəmmət bıkə. Bıdə hiç kəs bəti behurmətəti nıkə.

3

İmoniyon rəftor

¹ Bə imoniyon yod dənə ki, bə rəhbəron iyən hakimiyəton tabe bıbun, bəvon itoət bıkən. Bo har curə xəymandə ko kardeyro hozı bıbun. ² Hiç kəsi təhğir nıkən, davekor ne, xoşrəftor bıbun iyən de həmə odəmon mıloyim rəftor bıkən. ³ Oxo vaxt hestbe əmənen beağıl, beitoət, royku beşə, mıxtəlifə ehtiroson iyən ıştə həzzon ğul bıə, bılx, pəxıləti dilədə jiyə mənfur iyən bə iyəndı nıfrət kardə odəmon bımon. ⁴ Əmma çəmə Xiloskor bıə Xıdo xəymandəti iyən bə insoni mehıbbət zahir kardə vaxti ⁵ deçəmə kardə salehə koon ne, Bəştə mərhəməti qorə əməni xilos kardışe. Əy Deştə Mığəddəsə Rufi vositə şıştışe ocon vardışe, bəmə tojə jimon doşe. ⁶ Xıdo çəmə Xiloskor bıə de İsa Məsihi vositə Mığəddəsə Rufi bol-boli çəmə səpe ekardışe ki, ⁷ Deçəy lutfi saleh hisob bıbəmon, çəmə umu bıə zolə jimoni varis bıbəmon. ⁸ In sıxan etiboyne.

Az piyeydəme imoni xısusən ğeyd bıkəm ki, bə Xıdo imon vardəkəson de xəymandə koon mışğol beyro sərisofin bıbun. Im xəyrine iyən bə odəmon foydəş heste. ⁹ İntasi beağılə mıbohisonku, nəsilə şəcəronku, mınəoqışonku, de Ğanuni əloğəynə peresiyeku diyəro bıbi. İmon puçin, hiç foydə nişone. ¹⁰ Bə təfriqə eğəndəkəson iminə iyən dıminə kərə çəşnavi karde bəpeştə deyəvon ıştə əloğə bıbırın. ¹¹ Əmin be bəzınəş ki, jıqo odəm royku beşə iyən qınokore. Əy ıştən məhkum kardəşe ıştəni.

Xahişon iyən vido kardey

^{12*} Az Artema, yaan Tixiki vığəndəncən tı dastpoçə bıbi boy çımı tonə, bə Nikopolis. Çumçiko bə ğəror oməm ki, zımıstoni əyo dəvonım. ^{13*} Huğuşınos Zena iyən Apolloni dəro kardeədə dastpoçə bıbi ki, çəvon hiç qıləy nırasıy nıbuşone. ¹⁴ Bıdə çəmə odəmonən lozim bıə ehtiyocən doyro de xəymandə koon mışğol bey omutın ki, besəmərə nımandın.

¹⁵ Çımı tonə bıəkəson həmməy bəti səlom vığəndeydən. Bə əməni piyə imoniyon səlom bıvot.

Bəşmə həmməy lutf bıbu!

***3:12** Həv.20:4; Ef.6:21-22; Kol.4:7-8; 2Tim.4:12

***3:13** Həv.18:24; 1Kor.16:12